

06 JUN 2003

BPM-KREDIT

BANK PERTANIAN LULUSKAN RM105,000 UNTUK PINJAMAN KREDIT MIKRO DI SABAH

KOTA KINABALU, 6 Jun (Bernama) -- Bank Pertanian Malaysia (BPM) cawangan Sabah sehingga ini meluluskan enam permohonan pinjaman berjumlah RM105,000 di bawah Skim Kredit Mikro yang diperkenalkan bagi membantu pengusaha kecil dalam sektor pertanian, sekaligus menjana ekonomi negara.

Pengurus Besarnya Hong Thing Koay berkata ini menunjukkan permulaan yang baik untuk skim kredit mikro di negeri ini walaupun ia baru ditawarkan.

"Sebenarnya, kita telah menerima banyak pertanyaan borang untuk menyertai skim kredit mikro, dan kita menerima 15 permohonan untuk mendapatkan pinjaman yang berjumlah RM227,000.

"Bagaimanapun, enam permohonan sahaja yang diluluskan setakat ini. Kita berharap lebih ramai lagi usahawan kecil akan menikmati faedah skim tersebut," katanya ketika menyampaikan taklimat dan perbincangan dengan Timbalan Menteri Kewangan Datuk Dr Shafie Salleh mengenai skim kredit mikro peringkat negeri Sabah, di sini hari ini.

Hong berkata jumlah pinjaman yang ditawarkan di bawah skim itu ialah sehingga RM20,000 dengan kadar faedah sekitar empat peratus.

Selain BPM, Bank Simpanan Nasional (BSN) juga menawarkan pinjaman di bawah skim yang sama bagi membiayai projek bukan pertanian.

Bercakap kepada pemberita kemudian, Dr Shafie berkata setakat Rabu lepas, BSN cawangan Sabah telah menerima 47 permohonan pinjaman dan ia kini dalam proses penelitian sebelum diluluskan.

"Bagi membolehkan permohonan diproses dengan cepat, pemohon antara lain perlu mengemukakan pelan perniagaan yang berpotensi dan berdaya maju. Mereka juga harus mengemukakan "Mentor" untuk memudahkan proses kelulusan," kata beliau.

Beliau berkata skim kredit mikro diperkenalkan bukan untuk meraih sokongan menjelang pilihan raya akan datang, sebaliknya ia bertujuan memulihkan ekonomi negara yang terjejas akibat perang Iraq dan kesan buruk wabak Sindrom Pernafasan Akut yang Teruk (SARS).

Pada 21 Mei lepas, Perdana Menteri Datuk Seri Dr Mahathir Mohamad, ketika membentangkan strategi baru ke arah merangsang pertumbuhan ekonomi negara, mengumumkan pengwujudan program kredit mikro untuk membantu usahawan kecil yang akan dilaksanakan melalui beberapa pendekatan.

Ini termasuk penstrukturan semula BPM supaya ia juga menjadi bank kredit mikro bagi menguruskan pinjaman untuk membiayai perniagaan dan perusahaan kecil di sektor pertanian, dan sebanyak RM500 juta disediakan untuk skim kredit mikro di bawah BPM.

Selain itu, ia menyaksikan pengwujudan dana RM200 juta kepada Amanah Ikhtiar Malaysia (AIM) dan AIM akan diletakkan di bawah Skim Kredit Mikro BPM serta penyediaan dana sebanyak RM300 juta di bawah skim kredit mikro BSN, khusus untuk membiayai projek bukan pertanian. -- BERNAMA

NT OS